

SIARAN MEDIA

**PAMERAN HANYA SATU (SINGLE) – *WINGS BEFORE WORDS* OLEH
AHMAD SYAKIR HASHIM**

30 OKTOBER 2025 – Balai Seni Negara mempersembahkan sebuah karya instalasi terbaharu dalam **Pameran Hanya Satu (Single)**, iaitu ***Wings Before Words*** oleh **Ahmad Syakir Hashim**, seniman dan pendidik yang aktif dalam medan seni kontemporari Malaysia. Pameran ini berlangsung dari **23 September hingga 23 Disember 2025** di **Balai Seni Negara**.

Karya *Wings Before Words* lahir daripada renungan peribadi Ahmad Syakir terhadap pertentangan antara keraguan dan keyakinan, antara logik dan iman. Menggunakan lebih daripada 40 keping bahan *Ethylene Vinyl Acetate (EVA)* yang dibentuk dan disusun secara berulang di atas struktur keluli kukuh, karya ini menuntut ketelitian serta kesabaran tinggi sepanjang proses penghasilannya yang bermula sejak Mei lalu. Setiap lapisan bahan menjadi simbol perjalanan manusia yang sentiasa mencari keharmonian antara rasional dan spiritual.

Dalam karya ini, hubungan antara bahan dan idea diolah dengan teliti. Setiap unsur fizikal berfungsi bukan sekadar sebagai komponen estetik, malah sebagai refleksi terhadap makna keyakinan yang terbina melalui disiplin dan kesedaran diri. Gabungan tekstur lembut *EVA* dengan kekuatan keluli menghasilkan keseimbangan visual yang menggambarkan keteguhan iman di tengah-tengah keraguan dan kelemahan manusia.

Ahmad Syakir Hashim, dilahirkan pada tahun 1985 di Taiping, Perak, kini berkhidmat sebagai pensyarah sepenuh masa di INTI Centre of Art & Design (ICAD), Subang Jaya. Beliau merupakan lulusan Sarjana Seni Halus dan Teknologi dari Universiti Teknologi MARA (UiTM). Selain aktif berkarya, beliau turut terlibat dalam bidang penulisan dan kuratorial, menghasilkan pelbagai penulisan katalog serta kritikan seni termasuk untuk *Seni Kini*, terbitan Balai Seni Negara. Karya dan penulisannya sering menelusuri persoalan tentang identiti, kesedaran spiritual, serta hubungan manusia dengan realiti kontemporari.

Orang ramai dijemput hadir bagi menghayati karya *Wings Before Words* yang berlangsung hingga 23 Disember 2025 di Balai Seni Negara. Masuk adalah percuma. Maklumat lanjut, ikuti media sosial rasmi Balai Seni Negara atau layari laman sesawang www.artgallery.gov.my.

Dikeluarkan:

**Unit Komunikasi Korporat
BALAI SENI NEGARA, MALAYSIA**

No. 2 Jalan Temerloh, Off Jalan Tun Razak, 53200 Kuala Lumpur
Tel: 03-40267000 Fax: 03-40244998
E: ukk@artgallery.gov.my W: www.artgallery.gov.my

Untuk pertanyaan, sila hubungi:

Balai Seni Negara:

Mohd Zuriyadi Sarpin

T: +60 11 1005 5207

E: zuriyadi@artgallery.gov.my

Intan Syazwina Suhaimi

T: +60 19 998 5884

E: syazwina@artgallery.gov.my